

99 Fu posto, per i Savi, una lettera a sier Gasparo Contarini orator nostro apresso el summo pontefice, in risposta di sue, di certe dichiarazioni el vol, intervenendo includer re Ferandin in la pace, che lo debbi includer, ma non concluder se'l non scriva prima.

Fu posto, per li Savi, una parte, zerca serar el lotho, che si possi meter el prò de Monte vecchio de la paga de mazo 1482, et il prò di Monte nuovo, et si debbi serar et cavar i bolletini el di de San Martin *ut in parte*. Ave: 149, 10, 3.

Fu posto, per li Savi del Conseio et Terra ferma, sier Sebastian Barbo, sier Orsato Manolesso, (*Savi*) ai Ordeni, che in l'Arsenal sia messe in sesto 20 galie sotil et 5 grosse, et usar diligentia a compirle *ut in parte*. Fu presa, a preparar i coriedi. Ave: 163, 8, 2.

Fu posto, per sier Francesco Foscari, sier Vincenzo Capello, sier Lorenzo Bragadin consieri, li Cai di X, Savi del Conseio, *absente* sier Alvixe Mocenigo el cavalier, et Savi a Terra ferma, che'l barzoto grande fatto in l'Arsenal per Lunardo Brexan nel numero di do barze et uno galion fo principià a far, el qual si pol butar in aqua con poca spexa, per tanto sia preso che la dita barza se debbi compir de calafatar et butar in aqua, et li in Arsenal fornirla de armizi, *ut in parte*, con certe clausule. *Item*, se elezi per scurtinio un capitano de ditta barza, qual habbi per spexe ducati 25 al mexe.

Et sier Sebastian Barbo et sier Orsato Manolesso, Savi ai Ordeni, voleno che atento el carigo de lo armar et disarmar sia de Savi ai Ordeni, et essendo tempo de disarmar non che de armar, et per la penuria de armizi è in caxa, sia differito a tempo più congruo.

Et parlò sier Piero Orio patron a l'Arsenal, dicendo al Conseio, nel termine che l'è et con ducati 550 si compirà de calafatar et butar in aqua in l'Arsenal, dove se compirà, et con ducati 5500 se compirà del tutto, et non se romperà el muro a cavarlo, ma cavar passa verso le Verzene et ussirà per la porta, *etiam* bisogna cavar un poco a l'Arsenal, et il teren bisogna per far li volti. El qual barzoto è bellissimo de botte 1200, l'altro è piccolo de botte Andò le parte, perchè li Savii ai Ordeni messe indusiari, ma niun de loro parloe. Ave: 4 non sinceri, 7 de no, 22 di Savi ai ordeni, 152 del resto; et fu preso.

Da Ferrara, vene lettere del Venier orator, di 28. Come havendo el duca hauto lettere da

li oratori soi è apresso l'imperador, de Parma, che parlando del marchese de Mantua che vien a far reverentia a Soa Maestà, li fo ditto che vegniria *etiam* el duca de Ferrara, hessendo in piacer de soa Cesarea Maestà, la qual rispose esser molto contento et lo vederia volentieri, il che hauto ditte lettere soa excellentia montava per andar a Modena, dove troverà Soa Maestà, et va con grande allegrezza, et spera le cose sue se adatarà.

A di 31. La terra, di peste, niun fo heri, et di 99* altro mal.

Da Brexa, del proveditor zeneral Nani fo lettere. Zerca danari. Heri li fo mandà ducati 700.

Da Cremona, del Venier orator, di 28. Come il duca, per el ritorno del suo orator Sacho da Piasenza, ha inteso che luni a di 25 da matina lo imperador parti da Piasenza armado de arme bianche, et de sora uno sagio mezo d'oro et mezo de argento, et in testa Et mena con sè tutti li spagnoli novi menati con lui, et li vecchi, et li lanzinech erano a Milan. Scrive, monsignor l'armirao è stato li a Cremona, parlato col duca, va a Ferrara, ha più bella corte, si dice, che ha l'imperador.

Vene l'orator del duca de Milan, et comunicoe avisi *ut supra*.

Noto. A di 27 li fo dato li ducati 5000 a quel Tusignano, qual se partì de qui per portarli al suo duca.

Vene l'orator de Fiorenza, et disse haver alcuni avisi pervenuti da Fiorenza, che la terra se mantien gaiardamente, et di uno arcobuso era stato ferito in campo Vitello Vitelli. *Item* fo ditto, Fiorentini haver fatto apichar quel frate reteneno

Vene un nuntio di l'orator di Ferrara, qual è qui amalato, dicendo el partir del signor duca per Modena, per far reverentia a Cesare, sicome heri sera si have da l'orator nostro.

Da poi disnar, fo Gran Conseio. Non fu il Serenissimo, vice doxe sier Alvise Malipiero: fato 9 voxe et niun passoe.

Fo lecto, per Bartolomio Comin, la parte presa nel Conseio di X illustrissimo, a di de l'istante, zerca il balotar del Gran Conseio, per el voltar de bosoli. La copia sarà qui avanti posta.

Da poi Conseio li Consieri et Cai di XL se reduseno in Collegio col Serenissimo, et alditeno una differentia di sier Marco Bragadin, fo datier del datio del vin l'anno passato, con li officiali de le Raxon nuove, intervenendo el dazier, perchè l'dazio ha vadagnà ducati 10 milia, vol lui i libri, et li si-